

E SSW as radi for e wool

Kil. E SSW wal önj e tukaamene loonswool-kämp ma e slogan "Hergestellt und erprobt in Schleswig-Holstein" am wäälerstime wiirwe. "E SSW wörd önj Slaswik-Holstiinj grünlaid än heet mör as 60 iir erfääring deerönj än mååg politiiik for e manschne önjt lönj. Dåt as en pün, ma wat we önj e woolkämp hoonle wan", ferkläärd e SSW-formoon Flemming Meyer bait forstalen foon e woolkampanje önj Kil. "Di SSW heet ham fort jarst tooch sunt iirtiinde et müülj seet än ouerspräng e 5% dreempel. Ouerdåt et leest woolresultoot ål bai 4,3% lai, as dat en realistiisch müülj. We wan nuch tuleede, deerma we tu en schaften foon regiiring än politiiik baidreege koone", sü Meyer. Deeram wal huum mör as bit heertu uk önj ütseechte regjoone foon Holstiinj präsent weese. "Di SSW heet ai e madle, am åleweegens önj Holstiinj tu plakatiiren, ouers we doue üs möite, dat we uk for e manschne önj e sööden tu schüns san, wat üs ma jare tweed stim kiise koone. We wårde dütlük mååge, dat we politiiik for åle manschne önj Slaswik-Holstiinj mååge", sü di loonsformoon. Eefter e miining foon e SSW schal et lönj önj e tukaamene iirnge fjouer grute apgoowe liise, ferkläärd spas-kandidootin Anke Spoorendonk. "We schan döör bilding än wirtschapspolitiik for e manschne perspäktiive ääm mååge, e solidaritääit önj üüs seelschap hүүлje, e loonshühүүлj saniire än e bürgerruchte schööle. Et woolprogram foon e SSW jeeft en ra foon swååre aw daheere apgoowe for Slaswik-Holstiinj", sü Spoorendonk. Et SSW-woolprogram, et kampanjenloogo, beschriwinge foon e kandidoote än maning oudere informasjoone fant huum aw e hüüsesid wahl.ssw.de

Uursfeerie aw präiw

Söl. Aw Söl hääwes da bjarne jarling fort jarst tooch naie uursfeerie aw präiw hädj. Et Kiler bildingsministerium heet e feerie-räigel önj e nowämber 2011 beslin. For ålem ålerne, wat önj e turismus årbe, hääwe jam beklääged, dat's bit heetu knååp ma jare bjarne tuhuupe da feerie ferbränge köön. For e uursfeerie wörden e harfstfeerie foon trii aw tou waage ferkorted. Möre ålerneferbånde hääwe iinj jüheer liising protästiid än wjarn deerma ai tufreese. Et as ouers nuch tu eeder, am tu seeden, weer da uursfeerie uk for åltens infjard wårde, säå en spregster foont ministerium. We taiwe da resultoote ouf, jarst deerefter wan we önjtschiise.

16. Alvestêdetocht oufsäid

Ljouwert. Önj Weestfraschlönj hain's jam radi mååged for e 16. Alvestêdetocht. Sunt 1997 säch et uler wi sü gödj üt, dat et isråånen döör åle weestfrasche stääse wat wårde köö. Da chance stöön sügoor bääder as füfti füfti, dat huum et grutst friisk sportevent et waagiinje 11./12. önj e biikenmoune oufhülen köö. Deer wjarn maning friwalie önj e gung än fååg e snii foon e kanoole, dat et is deeruner gauer tjuker wårde köö.



Ouers dan köm e boose: Da feroontuurdlike foon e weestfrasch Alvestedetocht san iinjs am wörden, dat et is sam stäägne åltu teen wus fort ütschriwen foon et legendäär isråånen. Bütedåt wus et is aw ünlike plåke uk foon en hiinj kwalitääit. Än e wääderprognose wjarn ai gouenooch, säå e formoon Wiebe Wieling. Et wus en swååren beslit, sü Wieling, ouerdåt er önj e leeste deege sü foole årbed wörd fort ferbäädern foon e ruute. Maning duusende friwalie hääwe önj e leeste deege jare beest dänj. "We wänj et sü hål", sü Wieling, "Ouers kiiwenooch schölj et ai weese". Da feroontuurdlike for e önjtschiising, da sünåmde rayonhaden, kaame jarst nü ai wider tuhuupe. Uk wan e weedstrid for jarling oufbloosed wårde muurst, as e Alvestedeferiening "stoolt aw Friislon" än gån besuners aw da friwalie heelpere, stalt Wieling nuch iinjsen rüt.

Åstfraschlönj-Festival

Auwerk. Matthias Kirschnerit as e liidjer foont nai musiikfestival Åstfraschlönj. E regjonaalferbånd Ostfriesische Landschaft önj Auwerk heet e Hamborjer profåsor for klawiir bait huuchschölj for musiik än teoter önj Rostock as naie kunsteriische liidjer instald. Et grånseouerschriden festival for kåermusiik önj Åstfraschlönj än et naaserlönjsch Grinslönj as jarling foon e 27. juuli bit tu 19. august ploond, diiljd e Ostfriesische Landschaft ma. Da kontserte fine stää önj schörke, borje än sloote.